

藝風堂文續集

藝風堂文續集目

卷一

贈太子少保兵部尙書曹恭愍公神道碑 二品頂戴

記名簡放道員前廣東高廉兵備道陸公神道碑

兵部尙書銜浙江巡撫惲公墓志銘 兩淮鹽運使洪

公神道碑 中書銜處州府學教授黃先生墓志銘

州判銜候選訓導張先生墓志銘 直隸玉田縣知縣

夏君墓志銘 前戶部候補主事龍君墓志銘 徐子

靜墓志銘 琴和蕭君墓志銘 安徽靈璧縣知縣楊

君墓志銘 林母俞太夫人墓志銘 柳母鮑孺人志

銘

卷二

漢陽萬梅巖觀察夫人蕭氏合祔墓志銘 興化李君

妻趙孺人墳志 重修宋王忠蓋公墓碑 誥授奉直

大夫 誥封資政大夫重宴鹿鳴翰林院編修俞先生

行狀 朱君松筠墓表 錢敏肅公家傳 王生吉臣

家傳 世醫孫憩南家傳 曾太夫人左氏家傳 貞

孝程女傳 陳總兵事略 石濂和尚事略

卷三

後涼百官表序 南涼百官表序 西涼百官表序

北涼百官表序 夏百官表序 北燕百官表序

卷四

永樂大典考 可薩克兵考 婦女裹足考

卷五

錢唐丁氏八千卷樓藏書志序 皇朝三通識要類編

序 貴池二妙集序 隨庵叢刻初集序 朱修伯大

理結一廬文集序 半巖所見書目序 王仙舟同

年金石文鈔序 宋史翼序 重刊小謨觴館詩文集

注序 蔣頻青南北朝宮闈雜事詩序 陶廬雜憶序

劉寄靜畫屏吟題詞 錢藕衫遺詩序 雙卿詞序

次紅詞序 古歡室詩集序 石運菴刻山左人詞

序 無益有益齋論畫詩序 常熟繆氏義莊記 東

倉書庫圖記 海澨完雛圖記

卷六

元論語注疏十卷本跋 集篆古文韻海跋 浙刻沈

文起兩漢書疏證跋 大唐創業居注跋 宋太宗實

錄跋 留都聞見錄跋 啟禎兩朝剝復錄跋 楊山

松孤兒籲天錄跋 三垣筆記跋 中興戰功錄跋

戴氏直隸河渠書跋 元河南志跋 金石錄跋 求

是齋金石跋書後 閩中金石略跋 士禮居藏書題

跋記書後 劇談錄跋 影宋本述異記跋 曾公遺

錄跋 重刊明弘治吉州木蘇文忠公七集跋 嘯亭

雜錄補遺跋 新刊補注銅人腧穴鍼灸圖經跋 珊

瑚木難跋 寒山詩集跋

卷七

草堂詩箋跋 張說之文集跋 馮校本王建詩跋

劉賓客文集跋 司空表聖文集跋 西渡集跋 鄧

峰真隱漫錄跋 斜川集跋 石林燕語辨跋 諸儒

鳴道集跋 頤堂集五卷 注渠陽詩跋 輯本丹邱

集跋 說學齋藥跋 楊太后宮詞冊跋 劉後村千

家詩選跋 草堂雅集跋

卷八

柳公樂章校勘記跋 曹元寵詞跋 明秀集跋 遺

山新樂府跋 天籟詞跋 董西廂記跋 董王西廂

記跋 順治壬辰乙未戊戌三科齒錄跋 上館課本

書題識 涼王大沮渠安周功德碑頌跋 陳雪峰并
天第一卷跋 黔江帖殘本跋 唐張旭書肚痛帖梁
僧彥修書寄邊衣詩跋 宋人蜀川圖跋 方士庶摹
元繆叔民山水跋 徐壇長京江負笈圖跋 黃涪翁
勵志詩跋 投贈周樂園文冊跋 竹汀日記跋 黃
再同同年手札跋 書全謝山改正成仁祠祀典議
陽湖趙氏先世畫象圖贊 祭張文襄公文

藝風堂文續集卷一

贈太子少保兵部尙書曹恭愍公

鍾彝

東坡文

同治丙寅三月二十日己卯兵部

鍾彝

東坡文

疏聞

皇上軫悼丙戌

命惠郡王詣靈幃奠醑

贈太子少保

子諡恭愍

賜銀二千兩治喪是年八月公之子鍾彝扶柩回籍六年正月葬公於本邑東郊定山之西麓越三十年鍾彝昆弟來請銘公神道荃孫忝在嫺年晚之列何敢固辭謹按狀公諱毓

瑛字子瑜號琢如宋時自中州遷江陰爲邑望族曾祖岐附貢生祖學禮父昶以公貴

贈光祿大夫曾祖妣章氏吳氏祖妣趙氏妣繆氏朱氏皆一品夫人公幼而岐嶷及長有名庠序武進李申耆先生主講暨陽書院特器公勉以遠大道光丁酉拔貢生

朝考一等得兵部七品京官遷主事直軍機處癸卯中式順天舉人累升郎中

記名御史擢鴻臚寺少卿咸豐十年英法俄美四國兵犯京師

上駐蹕木蘭時江浙陷於粵寇豫東困於捻寇黔苗滇回四顧騷動鄭親王端華等方用事內外不靖政務殷繁

上意欲令章京中資深而才膽者在軍機大臣上行走公在直最久內嫻掌故外悉四方政令端華等欲以公名舉奏公辭至再三遂越次授焦佑瀛

本朝之制凡章奏陳達

制詔宣降皆軍機大臣取進止

朝廷黜陟誅賞之事悉以咨之位望與前朝宰相等同列以公力辭咸詫之公卒不就十一年

文宗顯皇帝賓天

毅廟冲齡踐阼端華等矯旨自爲議政大臣與決機務是年冬

毅廟奉

梓宮還京

兩宮太后垂簾聽政暴端華不法狀與載垣等皆伏誅次者遠戍次者褫職佑瀛亦與焉人以是服公之明而知公進身之不苟也既而

朝廷簡恭親王輔政始

命公在軍機大臣上行走升順天府府丞同治元年正月轉大理寺少卿旋兼宗人府府丞二年升工部左侍郎調兵部左侍郎克復金陵

加頭品頂戴

賞戴花翎權兵部尚書四年升都察院左都御史再升兵部尚書公貌甚魁偉以積勞內損然孜孜自力從公未嘗乞假

三月遘病甚劇猶欲強起足弱不能支乃止寢疾六日而歿
歿年五十有四公爲軍機大臣凡五載贊襄碩畫盡心竭力
內則調護

兩宮外則指揮諸將數年之間東南底定巨憝悉誅公但歸
功督撫凡所納獻未嘗告人人視之若無異於眾人者而不
知一言之褒貶一事之成敗皆足幹旋大局輔佐中興則所
處之地不同也臨歿時猶以豫皖捻匪未淨隴滇回匪未平
爲恨其燕閒之論謂軍旅之事患信任不專事權不一古來
良將多以掣肘不能成大勦咎在執政又云唐末藩鎮之禍
誤於羈縻方其效順時不過假以爲名作恢拓疆土計當事
者苟且偷安遂入其彀迨勢旣盛不可復制

朝廷任用督師大臣及剿辦苗沛霖皆如公言以奏功此卽
公立朝之大指也公天性爽亮與僚友交極矜慎取予不苟
事父母色養兼摯在京寓歲時伏臘必邀集桑梓故舊談讌
竟日以博歡顏朱夫人夙患乳岩公購珍藥訪名醫費千金
弗倦棄養後哀慕弗衰初入直奉

賞珍食名果恒捧以獻親欣躍逾常迨爲軍機大臣

恩賞稠疊拜領後反鬱鬱不樂傷二人之弗及兒也嗚呼此
則公侍親之至性已公娶同邑薛氏

封一品夫人妾胡氏鍾氏子四鍾彝

賞員外郎分刑部四川長壽縣知縣鈞彝

賞舉人先卒錦彝

賞員外郎分戶部貴州黔西州知州鉅彝

賞光祿寺署正鍾彝薛夫人出餘胡氏出女二同邑孫汝楫
浙江龔家誼其壻也爰作銘曰

申甫治內方召治外中興之功赫赫獨大維

皇首出撻伐用彰惟公峬興啟沃謀臧始登郎曹遂履

禁嶭星紀一周淵淵嶽嶽洎膺大任密勿論思發揮宇宙綏
輦華夷粵西倡亂蚍蜉四起用師十年蔓延未已自公贊畫
五載經營楚蜀江淮以次削平旣靖東南將事西北惜哉陽
烏方中旋旻公志未伸公言不矜我銘公烈惇史是徵

二品頂戴 記名簡放道員前廣東高廉兵備道陸公神道

碑銘

公諱心源字剛父號存齋晚稱潛園老人姓陸氏浙江歸安人曾祖景熙祖映奎父銘新三代皆以公貴

封榮祿大夫妣皆一品夫人公資稟奇穎讀書目數行下年十三通九經尤精鄭許之學受知于萬文敏公青藜吳閣學式芬張文貞公錫康先輩如徐莊愍公有壬朱司馬緒曾皆引爲忘年交與同郡姚宗謚戴望施補華俞剛王宗羲凌霞以古學相切劘時有七子之目性喜管商書於

國朝諸儒尤服膺亭林之學中咸豐己未舉人遵例以知府分發廣東奉直督劉公長佑奏辦直東豫交界剿匪事宜告竣以才識精明志行清直奏留直隸整頓吏治薦擢道員乙

丑

簡廣東南韶兵備道行抵英德卽聞長甯土匪擾六里鄉翁源知縣張興烈被戕嶺南姑息成政戕官之案疊出每辦匪鄉必有耆老數輩攜婦女哀乞承認繳匪官民相爲粉飾公視事檄遊擊湛恩榮率兵剿洗罪人斯得地方救平自是十餘年粵中無戕官案會霆軍叛勇突湖南入粵勢洶洶急檄湛遊擊回援樂昌益以壯士千礮船二十水陸並捷賊遁江西而洪逆餘黨踞閩粵之交思復蹂江楚南韶當其衝始由龍南撲始興卽檄副將朱國雄扼縣城再由連平犯翁源檄參將任玉田扼雞仔嶺賊不得逞南韶卒無恙韶關商賈貨物盈牖一物漏稅全船充公公革除弊政凡漏稅者祇准補繳不准充公積蠹一清商民感悅六年調高廉道旋奉

旨開缺送部引

見繼丁外艱星奔回籍壬申閩督李公鶴年以佐治需人奏調赴閩總辦稅釐通商善後諸局並海防事宜署糧鹽道與署督不合卽乞養歸仍以鹽務加耗參奏削職時公歸里已二載矣公循陔之暇娛意林泉就城東蓮花莊北闢小園水木明瑟極清曠之致署曰潛園酷嗜異書大江南北兵燹之後故家藏書出以求售所得宋元版書於斯爲盛光緒戊子進書國子監舊刻舊鈔一百五十種計二千四百餘卷附以所刻叢書三百餘卷奉

旨褒獎公在家獨建昇山橋修復安定愛山兩書院仁濟善堂義學無不具舉張勤果公嚮撫山左以才堪濟世學識閎

深奏李文忠公鴻章督直隸以氣局遠大見義勇爲奏得
旨開復原官交軍機處

記名簡放癸巳引

見

召對一次歸抵天津卽嬰末疾次年十一月九日卒於里第
年六十有一夫人莫氏子四樹藩舉人江蘇候補道樹屏舉
人樹聲湖北候補知府樹彰幼以 年 月葬公於 鄉
所著儀顧堂文集二十卷儀顧堂題跋十六卷續跋十六卷
皆古書源流金石考證之學藏宋刊書至一百餘種元刊至
四百餘種儲之韻宋樓作韻宋樓藏書志一百二十卷續志
四卷所得金石碑版九千餘通多青浦王尙書未箸錄者作

金石粹編續二百卷鑒藏書畫作穰梨館過眼錄四十卷續錄十六卷生平篤嗜唐文於蟬斷亥朽掇拾錄存與金石之文新出土者成唐文拾遺八十卷唐文續拾十六卷樊榭山人宋詩紀事於兩宋詩人搜羅備至復輯得三千餘人得詩八千首作宋詩紀事補遺一百卷其厲書小傳有仕履不詳時代未著者別爲小傳補正四卷其他善本卷帙繁重不及編刻者作羣書校補一百卷搜故鄉風雅補志乘闕遺作吳興詩存四十卷吳興金石記十六卷歸安縣志四十八卷病宋史蕪簡考黨禁始末作宋史翼四十卷元祐黨人傳十卷嘉定錢氏疑年錄之作大抵詳于儒林文苑及書畫之士公既校正錢澣鄰疑年錄四卷復益以名臣大儒氣節文宣之

士作三續疑年錄十卷儲藏三代秦漢鐘鼎彝器百餘種晉
唐古鏡六十餘種輯古今言金石者以補李學博富孫之缺
得三百餘人作金石學錄補四卷合署曰潛園總集共九百
四十餘卷嗟夫士大夫達而在上則出其經濟爲國家拯災
救患措斯世於隆平卽不然亦以培植鄉里之後進刊播古
人之著述有益於前賢有造於末學出處雖殊事功則一若
公者可謂兼之矣公沒後公子樹藩以碑文爲請荃孫諾之
而未有以應也今補作此碑以踐前言銘曰

公初筮仕才氣無雙聲名炳鑠閩江粵江五聲七政四達八
窗未盡石畫難泯眾唯自修有方止謗之術不占豹變遂甘
蝮屈昌谷嘔心武鄉抱膝乍起東山已迫西日我在京師因

友通郵我歸江南遣子從遊不矜山海而納壤流知己之感
衷於千秋仰止亭林古今一致顧則空談公則實事詎料長
才止供小試著作永存儒林職志銘墓一諾瞬已十年荒山
寂寂宿草芊芊大名如在豐碑再鐫文以傳公翻藉公傳
兵部尙書銜浙江巡撫惲公墓志銘

光緒庚子十月

乘輿西巡海內多故

特簡浙江布政使惲公爲巡撫加兵部尙書銜以鎮定海置
十二月卽奉太夫人諱星奔歸歸而病未及終喪而卒海內
士大夫識與不識無不齟齬傷之以時事艱難而爲

國家又失一柱石之臣惜也次年公子毓良毓珂葬公於新

塘鄉之夾山駟狀乞銘荃孫卅載舊交加以姻戚不敢以不
文辭按狀公諱祖翼字叔謀一字菰耘同郡陽湖人曾祖耕
方祖煜直隸南皮縣知縣父光業安徽候補道皆以公貴
贈光祿大夫公於同治三年本省鄉試中式由謄錄議敘知
縣改郎中疊保道員分發湖北補糧儲道調補漢黃德道監
督江漢關擢湖北按察使再擢浙江布政使

簡巡撫兼理鹽政復兼總理各國事務大臣花翎頭品頂戴
誥授光祿大夫卒年六十有五

國家自咸同以來外交內患百端紛集事機變幻間不容髮
罕能當機立斷措置裕如者公任營務處時江夏知縣蔡炳
榮以事鞭督標營弁弁率黨伺知縣毆之幾死制府怒將盡

法懲治一軍盡甲公馳至營徒步入呼曰汝等皆義士當爲國宣力今怯於公戰勇於私讐非義也吾戴吾頭來論汝汝不悟死矣迺釋械痛哭伏地令縛送首禍事遂定武漢匪首王覺一潛伏紅牆巷約期舉事公夜偕中協馬朝龍率親兵破門入羣匪驚短兵接立獲五十餘人餘潰去任按察使時濱漢六州縣匪萃焉公偵知其處授知縣包鵬飛方略以夜出以晨歸獲匪累累如魚貫民驚頌曰神明匪徒斂迹任中丞時值浙江衢州戕官焚教堂之變英國欲以兵艦赴浙浙人洶懼公禽捕眞犯十餘辦以抵償而定文武官戍邊視職罪英人百計撓之力爭而後就範其勇於任事如此官漢黃德道時漢江舟楫檣帆林立水漲驟高立刻傾覆公創

設襄報水電豎牌鳴鉦各船預備水至無患洋商夾板船向泊魯山下妨民船出入之路公以大義商稅司請上移晴川閣外漢鎮闌闔屬集火災四起公飭合鎮商民於曬臺儲水缸購小洋龍入窄巷施救又移洋油隙地數年之閒水火之患大減官布政使時上虞山水驟發風潮頂衝南岸土塘決口七處公改土購石砌盤釘椿成石塘一千數百餘丈以捍水而入浙時目擊露骸敗榼拋棄河干穢氣薰蒸蠅蚋四集立撥巨金埋二萬七千餘具有澤及枯骨之頌其愛民之仁又如此類皆剛健勇決轉危爲安而慈祥愷惻之忱亦賴精心大力始足展布功可以格天惠足以濟世非苟且補苴焉者蓋公仕宦數十年計必達乎至微力必摧乎至巨求治雖

急必體乎人情律已甚嚴而不爲苛論上台任之僚案信之士庶感之故嶄然有以自見夫人高氏治家有法訓子有方先公七十日卒同葬於穴子毓良江西候補知府毓珂工部郎中孫宜曾望曾俱幼爰作銘曰

大雲出山巖巖輪囷散爲膏雨粒我蒸民生質雖美必牖以學涵泳詩書雕琢禮樂幾希之存

書室署曰存幾希

必衷以道白日

青天肫肫浩浩愛人則李睦族則范心造臣規身成士範事功旣著內行尤殊施於有政惟孝友于胡不期頤光我邦族因毀而殞遐邇一哭荒荒原野鬱鬱佳城凡百君子視茲彝型

兩淮鹽運使洪公神道碑

宣統元年二月兩江總督端方奏已故兩淮鹽運使洪汝奎服官政績請開復處分奉

旨俞允於是公子槃奉事略踵門請曰先公之歿三十有四年矣因未復職不敢碑不敢廣求傳志今

恩綸丕煥光及泉壤先公在江南所任之事江南人知之所獲之咎江南人亦知之吾子其次爲文傳之當世感且不朽荃孫禮不敢辭謹按事略公姓洪氏諱汝奎字琴西先世籍皖南涇縣後僑寓漢陽遂占籍焉曾祖兆熹祖璫祥父錫錄皆以公官

封贈中議大夫妣淑人公秉姿穎異自幼劬學凝重若成人年十九補弟子員甲辰恩科舉人丁未考取教習受知於

太傅曾文正公蘄以遠大使事同邑劉先生傳瑩益勉爲經世有用之學至是與長白倭文端公旌德呂文節公師宗何文貞公餘姚朱侍郎蘭霍山吳侍郎廷棟講學春明尤邃於宋五子書以躬行實踐爲主咸豐間粵寇亂作轉徙流離樂道安貧絃歌不輟庚申入都補正白旗 覺羅官學教習俸滿引

見奉

旨以知縣用益陽胡文忠公時駐軍英山聞其名禮招之遇以國士嗣參曾文正公戎幕克安慶下江南贊畫軍謀多所裨益公故皖人凡涉地方利病胥就咨詢皖南被兵久郡縣殘破特甚休養生聚務農爲先請於文正公籌給耕牛籽種

廣招徠資開墾民氣大紓軍實亦足同治丙寅合肥李文忠公權節兩江委領精臺凡支應本省防餉外省協款劃還西征洋債出入逾二千萬公綜核名實洪纖不遺弗當用者不避嫌怨力加裁汰一遇日本窺臺之衅再遇俄人要盟之患內籌軍實外固海防晝夜焦勞不遑寢食卒以緩急有備隱恃無恐光緒丁丑晉豫大饑江南諸不逞之徒乘機竊發公時綜理營務設法捕治之不少懈其贓證未確如(儀)徵溧水解省盜案凡數起獄悉具矣察有冤抑立予平反而高(淳)一案某令持之甚堅及眞犯就禽卒以帖服己卯沈文肅公督兩江因疾篤再籲開缺疏請以公代拆代行時望翕然歸之會海疆有事

詔下王大臣密保人才中外交章論薦遂由候補道員

特旨擢廣東運司旋調兩淮異數也涖官後整飭疲綱痛裁
冗費抑鑽營拔淹滯仕途一清又以地方諸務廢弛銳意振
興如建義倉修城濬河諸役不數月百廢具舉三牌樓獄起
遂有軍臺之役公夷然就道曰雷霆雨露莫非

君恩一身榮辱何足計獨不能爲沈文肅公一雪枉殺之誣
不無抱疚於中耳是時言路大開是非遽起如浙江餘姚之
案四川東鄉之案誅削譴責無不如言者之意而翻覆過甚
亦未能持其平文肅公涖督兩江五年吏治澄清闔境安堵
黎民至今思之而後之爲政者鑒於前車泄沓成風釀成不
治之證火烈水懦利弊立判公雖失官何足悔哉壬午七月

抵戍所其地書院講席適虛奉公主講公爲之購典籍勤講
解處憂患之中而不忘勸學之事猶素志也居數月得
旨賜環旋奉發廣東差遣委用之

命李文忠公寓書勛以時事艱難勉圖報稱旋馳抵廣東任
善後海防事宜猝得疾卽不起丙戌十二月十二日歿於廣
東行館公內行純粹孝於親友於兄弟自奉儉約而樂於施
予又以亂後書籍散亡在江南淮南書局籌刊經史廣爲流
傳其祕籍精本往往多經手校尤搜輯先德著述壽之梨棗
所以述前烈勛後人者用意至爲深遠以學特經濟負海內
清望者三十年文正公嘗手書褒答以爲畏友文肅公更待
以師友之間顧公深自韜晦恆惴惴以不克副盛名是懼出

處大節光燦然不苟有古君子難進易退之風配朱淑人歿
後公四年合葬當塗楊家莊之新阡予九人縱恩嘉弒擇均
歿恩毓福建止杭縣知縣恩廣直隸存記道槃江蘇候補道
鼎棻署江蘇靖湖同知恩苞署浙江海縣知縣文二長適
潘杰江蘇候補府經歷欽適崔逢霖貴州廣順州知州孫男
十九人曾孫十三人荃孫久聞偉績敬述銘辭因擊時事之
目下而歎我公之不復作也爰序其事而爲之銘銘曰

同治初元雲龍風虎庶政綱綱公生孤寒于將莫邪作作生
鎡湘鄉知公拔從寒賤實之戎行合肥知公反旆北征責以
轉饒侯官知公納之幕府左右助襄公感知遇忘身趨公听
夕不遑江南甫定精徒殃表百端擾攘辟以止辟匪殄除暴

實以安良閭閻億兆江湖千里枕席梯航射工巧伺讒夫助之奪職投荒

賜環未久復奉

恩命馳驅粵疆冰天瘴海精力消鑠歸神天間臣精亡矣臣力竭矣臣志未償嗚呼臣志夙昔所慕內聖外王

今皇御極功功罪罪下燭豪芒

恩旨復官九泉有知感激悚惶官有何榮闕茸以警循良以彰後有式者視茲貞石青山之旁

中書銜處州府學教授黃先生墓志銘

先生諱以周字元同號倣季浙江定海廳人曾祖必悌祖興梧庠生父式三歲貢生敦行力學著述等身入

國史儒林傳先生本名元同字經纂後出試同知某命改從
今名少承家學與兄儆孟儆仲相砥礪六歲入塾識說文部
首字遂讀經先禮次詩書次春秋易每一業數輒條分節目
疏通大義十九補諸生同治庚午優貢旋舉於鄉光緒庚辰
大挑二等以教職用補分永縣訓導辛卯瞿學士鴻禴稱其
素履誠樸粹然儒者保中書銜後學政潘學士衍桐又稱其
研精殫思物疏道親保以教授升用旋選處州府教授而年
已七十禮宜致仕遂不就先生恪守父訓以傳經明道爲宗
旨其事父三十餘年未嘗去左右父卒前數月大厥而蘇成
偏枯疾手不能作書一日自敘黃氏塾課字形蜿蜒難讀先
生適自外返見而大驚請口授爲書之父卒先生裝絕筆一

紙不忍毀棄且曰示我子孫知吾父拳拳是書所以佑啟後人者深且遠也居喪盡禮不徇時俗刊遺書行世先生以爲三代下之經學漢鄭君宋朱子爲最而漢學宋學之流弊乖離聖經尙不合於鄭朱何論孔孟

國朝講學之風倡自顧亭林顧氏嘗云經學卽是理學乃體顧氏之訓上追孔門之遺言其說易則由孔聖之大象傳以尋畫卦之旨由孔聖之彖爻傳以尋彖爻之旨詩必宗序書必條貫大義春秋用比事之法三傳校以經例定其短長而三禮尤爲宗主凡詳攷禮制晝夜研索多正舊說之誤釋後人之疑而意在覈明古禮示後聖可行所著禮書通故百卷列五十目古先王禮制備焉其書足以究天人之奧通古今

之宜至其道德性命之學則在辨虛無辨絕欲以執一端立宗旨爲賊道悉折衷經訓以燭叛慙疑枝邪離遁窮之情形所著經訓比義三卷列二十四目嘗謂博文約禮聖門正訓學者欲求孔聖之微言大義必先通經經義難明必求諸訓詁聲音而後古人之語言文字乃瞭然於心目不博文能治經乎旣治經矣當約之以禮又謂禮者理也天理之秩然者也攷禮卽窮理後儒舍禮而言理禮必實徵往古理可空談任凡也欲挽漢宋學之流弊其惟禮學乎或云禮爲忠信之薄是言一出而周衰或云禮豈爲我輩設是言一出而晉亂學術不明而治術敝是先生以經學爲理學卽以禮學爲理學顧氏之訓至先生而始闢先生以孟子學孔子由博反約

而未嘗親炙孔聖其間有子思子綜七十子之前聞承孔聖以啟孟子乃著子思子輯解七卷而舉子思所述夫子之教必始於詩書而終於禮樂及所明仁義爲利之說謂其傳授之大旨是深信博文約禮之經學爲行義之正軌而求孟子學孔聖之師承以子思爲樞軸暮年多疾因曰加我數年子思子輯解成斯無憾既書成而疾瘥更號曰哉生蓋先生之學由子思學孔孟至是而其志竟矣其學亦大成矣黃侍郎體芳視學江蘇建南菁講舍延先生主講先生教以博文約禮實事求是道高而不立門戶常語門弟子曰前代之黨禍可鑒也宗湘文觀察建辨志精舍於甯波請先生定其名義規制而專課經學著錄弟子千餘人戊戌去江陰歸隱於仁

和半山之下卒於己亥十月十七日年七十有二卜葬於海晏鄉黃家橋之東配梅夫人妾陳氏子六人長家辰附貢生次家岱優廩生先歿次家鶯廩膳生皆梅出次家驥先歿次家穀次家嶼皆陳出焉荃孫戊子在南菁與先生接席者兩年冲如曇如粹然儒者時時請益反復詳告不憚煩也今家辰等來請銘其曷敢辭銘曰

國朝家學紹漢邁唐元和之惠高郵之王鼎足其間先生觥觥佩觿自警炳燭未遑禮堂寫定北熊南皇居鄉植品天府圭璋滌筆摘辭炎漢班揚著錄弟子羣奉瓣香歲星周天久留吾鄉傳鐙負笈絃誦鏗鏘山頽木壞萬口悼傷張嘯黃漱同祀永薦烝嘗

州判銜候選訓導張先生墓志銘

先生姓張氏諱文虎字孟彪又字嘯山江蘇南匯人幼穎異見書輒自翻閱嘗讀元和惠氏歙縣江氏休○戴氏嘉定錢氏諸家書慨然歎爲學自有本馳騫枝葉無益也則取漢唐宋人注疏若說經諸書由形聲以通其字由訓詁以會其義由度數名物以辨其制作由言語事蹟以窺古聖賢精義旁及子史是非得失源流異同以參古今風會之變道光壬辰大比戚友強之行試卷墨污題詩號舍而出自是不復應試金山錢雪枝通守熙祚輯守山閣叢書屬先生校訂館錢氏三十年所校書若守山閣叢書指海珠叢別錄及鼎卿學博熙輔續輯藝海珠塵王癸集夢華少尹培名輯小萬卷樓叢

書無慮數百種時稱善本嘗三詣杭州

文瀾閣縱觀

四庫書手自校錄續溪胡竹邨培輦元和陳碩甫奐同寓西湖過從商推甚歡中閒西游天目南登會稽尤愛天目之勝因自號曰天目山樵年二十八始就婚於金山姚氏越四年舉一子曰錫卣癸卯偕錢通守游京師通守卒於邸先生載其柩南歸時輯指海未竟其嗣偉甫培杰子馨培蓀請畢先生力任不辭海（謂）李壬叔善蘭與先生讀算契合咸豐初先生從英吉利士人艾約瑟偉烈亞力新譯重學及幾何原本後九卷而艾約瑟輩深明算理格致之學聞先生名數數造訪質疑問難咸大折服歎爲彼國專家勿能及咸豐丙辰移

家張涇堰蓋贅於姚二十有二年至是始有家也粵匪之亂轉輾避難曾文正公聘赴安慶李文忠公繼督兩江議刻經史因與先生商訂條例文忠稱善遂留書局八年癸酉先生以老固請始得旋里蘇撫檄各屬修志乘本邑金令福曾造門敦請奉賢韓令佩金華亭楊令開第亦相繼以志事來聘勉應之錢子馨議輯先世書目留先生於郡城復園光緒丙子秋子馨歿遺孤幼先生傷之爲處分其喪事再聞姚孺人之訃悲慟不能已自是神氣稍衰矣未幾學使瑞安黃公體芳創建南菁書院於江陰按臨松江時躬延先生主講席時先生足艱於行再三辭不獲秋七月赴江陰冬十一月旋里足疾加甚乃具書請退甲申長至得類中疾乙酉正月卒於

復園年七十有八先生於書無所不覽過目輒記尤長於比
勘遇疑義必反覆窮究廣證旁引以匯於通往往發前人所
未發所著各書曰校刊史記集解索隱正義札記五卷舒藝
室隨筆六卷續筆一卷餘筆三卷雜著甲編二卷乙編二卷
賸藁一卷詩存七卷索笑詞二卷又嘗以漢魏以來古樂失
傳而古書之存於今者祇滋後人聚訟乃因端以考其器數
審其聲氣以究古今之變異作古今樂律攷一書顧尙之先
生作殷_麻攷申鄭氏一家之言先生證之經傳謂鄭氏誤執
緯書及大傳之文致召誥注破經從_麻而劉歆又損夏益周
移前五十七算以求密合經文爲作周初歲朔攷以疏通之
先生之學博大宏達旣以經學小學_麻算樂律立其本泛濫

以及其他莫不洞悉源流燭見幽隱實事求是由博返約勿
苟於著述勿囿於門戶溯自惠江戴錢諸家而後可謂集大
成也已然先生豐於學而齋於遇少時疊遭大故家屢空殆
人所難堪自是客游日多垂白歸來又抱伯道之戚而先生
不以是廢學手一卷外無他嗜好老而彌篤顧尙之爲先生
石交著作等身先生爲謀於上海莫令祥芝俾爲刊布婁朱
虞卿先生大韶邃於經術先生選錄其經義若干篇今李勉
林中丞校付梓人海內迺知朱顧之學先生力也曩以諸生
從文正公軍營保以訓導選用光緒初援例加州判銜錫自
遺腹有一女贅同邑附貢生王保如生外曾孫孝曾歸爲先
生後孝曾殤復以慰曾來歸焉荃孫幼罹兵燹避地楚蜀未

會捧手授教後先生四年來主南菁講席華亭張錫恭出此
狀來求銘爰作銘曰

東南諸老首推潛研先生繼之名滿垓埏六書九數如日中
天合朔周初協律宮縣微言克紹絕學能專少絕仕進青紫
無緣晚爲賓客懸直自全校讐最工几席丹鉛更生子固輝
映後先明湖之濬冶城之巔大名不滅遺事獨傳龍蛇歲厄
牛斗星懸隻雞斗酒誰過新阡

直隸玉田縣知縣夏君墓志銘

國朝親民之官惟州縣爲最近造福易造禍亦易苟能於簿
書期會之中盡一分之心卽吾民受一分之益雖在一事一
物精神實已貫注固非苟且補苴已也今於玉田縣夏君見

之君諱子璽字上珍江陰人曾祖敬模祖祖耀父翼鳳庠生以君得官

封贈如例君以邑庠生應北闈已未

恩科鄉試挑取臚錄傳送

玉牒館議敘縣丞分發直隸前兩廣總督張靖達公調辦營務敘功保知縣署雞澤補^雷晉調玉田光緒甲申閏月卒於任年六十有八君任知縣前後二十年由署事至實授由僻遠至繁劇所至有聲其治績大要有三曰興學曰治水曰聽訟舉其最卓卓者夫士爲四民之首藥其固陋牖其性情文教日興而吏治亦蒸蒸日上畿疆旱澇無歲無之水不爲利則能爲害決去壅塞而潤澤自生至不得已而聽訟在他人

則以明察自矜而君則以至誠相感也其興學也在雞澤修鳳輝書院在(甯)晉修洺濱書院在玉田修經州書院廢者復隘者廓經理有方課程有序而士氣振矣其治水也在雞澤濬牛尾河在(甯)晉修治復洺在玉田振癸未水災修各河隄工莫不出斯民於沮洳而登之衽席而民心悅矣其聽訟也在雞澤則詰里胥侵匿錢糧而嚴懲之在(甯)晉則捕獲劇盜馬小眼等置諸法在玉田釋寇鄭氏逮土豪林三強悍者服其罪並伏其心善良者遂其生并祛其害而民志安矣玉田畿東孔道迎送至繁

大饗

山陵供應周至君雖事事應付而精神遂形耗憊馴至不起

身後並無餘財廉吏可爲而不可爲其是之謂歟配曹宜人
歸公二年卒繼配韓宜人後公十七年卒合葬於本邑之

予詒垣官山海通判

特旨記名以直隸州用女一適前內閣學士馮文蔚孫某某
詒垣奉行狀屬荃孫爲之銘曰

曰恭曰仁應得其壽何循聲遠聞乃施不下究惟謳思之弗
忘惟後嗣之克昌不可欺者烝黎而必予報者彼蒼

前戶部候補主事龍君墓志銘

改桐廬袁燾秋同年文

君諱繼棟字松岑廣西臨桂人浙江乍浦同知諱光甸君王
考也江西布政使治蹟人

國史循良傳諱啟瑞君之考也布政公以巍科侍從厯事

宣宗

文宗劬學直諫有聲以通副出綰江西藩條時髮逆糜爛兵饑支絀公佐巡撫耆齡支拄危難籌兵食設防剿方略有功屬績之日家無餘財賴人至今思之公交滿天下並世若唐確慎倭文端曾文正梅伯言何丹畦朱伯韓邵蕙西皆相與勵志節揮問學風氣所漸口耳濡染故君亦恍槩有父風若荀陳之有慈明元方也君博涉羣籍喜馳騁文詞通小學工篆隸體勢堅穆近世側鋒鏤紆惡札一掃刮絕以同治壬戌舉人官戶部額外主事

惠陵復土翰林院檄君恭篆冊寶予笑云李陽冰自言斯翁後直接小生今當謂張惠言後直接君已蓋張先生曾充

裕陵篆冊寶官也君亦驟然布政公遺著橐艸繁重成一家言君次第刊成古韻通說爾雅斟注春秋說及經德堂集又有是君是臣錄刺取涑水通鑑切於當世急務者比事屬辭爲之將以進

御當諫書殺青未竟而君獲譴遂中輟光緒庚辰雲南報銷獄起君以婦翁劉武愼公督滇故屬爲料理吏瑛軍機章京周瑞清君邑子也戶部郎中孫家穆官同曹兩人受滇員賂爲言官所彈下獄對簿詞牽連及君逮繫白雲司六閱月獄具遣戍軍臺武愼中興賢疆吏有清名坐失察所遣滇員交通請託削職歸而君亦坐此次壞終其身命也夫戊三年子代君奏記李使相君父執也使相資君千金繳臺費得釋回

主萬全縣講院課諸生有義法四方多故君身處一鄧閒日
與老兵語殷憂時事輒義形於色手輯錄公私邊防奏議續
畫卡倫鄂博要害形便常有效國殤扞牧圉之志氣其素所
蓄積然也辛卯

上敕重刊圖書集成用石印法在上海籌辦濟甯孫尙書與
君有舊陰爲書成敘勞地任以校讐君遂南行泄局日輯二
百葉幾十萬言爲之目眇腕脫積校勘記二十巨冊是書遂
成善本甲午

慈聖萬壽君以祝嘏還原銜乙未書成齎兩江咨牘赴闕呈
進值濟甯病免無人爲君言者君乃浩然歸旋主江甯之尊
經書院予官皖南每白吏事大府輒與君相見丁酉臘主君

家同遊烏龍潭樂甚戊戌夏恩恩一晤予旋北行己亥君丁
太夫人艱哀毀疾甚久不接君書庚子春晚見君戚督部劉
公子詢之則君以今年正月物故矣年裁五十六遺集若干
卷往者觀荷於南北泡子棹酒船臨深淵與君扣舷浩歌風
雨倏至天地晦冥須臾開霽寒燠頓易此情此景宛然心目
予恍君畸落不偶追懷曩游怯重履其地人生百年臣之質
已亡矣可哀也夫妻新甫劉氏子一述祖年少嚮學縣君澤
冀在此子女子子若干人登某某自非太上孰能忘情乃最
敘君厓略爲之銘以塞予悲其詞曰

清門瞻辯氣夷以盥介立平進可躋大通一鍛鸞翮荷戈忡
忡困靡輟學行戒苟同不慎交游而潔其躬憂能傷年齋志

幽宮我銘 隳石悲君道窮

庚子四月得袁太常同年手書附寄龍主事松岑墓志屬
交其子述祖予因其事蹟有謫誤處覆書速君改易而五
月京師變起七月太常爲權臣所害志艸尙在予篋謹爲
刪改交龍公子上石庶不負良友之意云江陰繆荃孫識

徐子靜墓志銘

君諱士愷字壽安子靜其號也安徽石埭人其先在南唐時
有名剋者刺歙州家焉其地卽曰徐村後又遷於石馬塘遂
爲石馬派曾祖祖父三代

誥贈如例君幼失怙哀毀如成人親友皆稱之以爲遠大才
也逢寇警徙泰州年方逾冠熒獨流離艱苦備歷遂習吏事

卽負能名同郡劉芝田中丞聘司記室最所激賞迨劉公握
蘇松太道篆倚之如左右手繼任如邵龔聶劉諸觀察皆委
任焉上海樞署繁難甲天下慎交涉核財政籌振給運軍械
君以一身揜挂其閒一飯十起一檄百下而前後二十年任
愈專名亦愈重每他省有大事各大僚飛書求助君亦不辭
況瘁而總其成敘功疊保二品銜花翎以道員分浙卽補君
慨然曰予幼遭喪亂父母兄嫂相繼卽世天倫之戚貽憾終
身每念及斯不勝悲痛豈忍希圖祿位重傷余心況知止不
殆古人之誨余多矣遂不出蓋君天性沖澹功名不期得而
得故亦漠然置之嗜金石文字著金石拾遺泉錄泰漢官私
印譜輯亡兄遺藁寄生山館詩詞鈔刻之別刻觀自得齋叢

書若干種君勇於爲善公私同之本邑文廟由君倡捐肇修而公子正鈞卽於是科獲雋尤嘖嘖在人口細行不書書其大者君卒於光緒二十九年十一月十九日年六十葬江蘇吳縣鄧尉鄉之澗上配周夫人子二長正鈞辛卯舉人揀選知縣次正銓殤女適上虞袁楠側室彭氏王氏生子正鏗孫心培心坦皆正鈞出正鈞奉伯氏祀以心坦嗣正銓爲君後云荃孫謹次其事而爲銘曰

吉金樂石夙敦古歡篤好如君近世所難富貴浮雲見機獨早淡泊如君名場所少天寒歲暮升君之堂哲人其萎兩闕星霜花竹一庭琳琅千軸遺墨淋漓羨君眼福叢臺百幅佳句一囊形神若接味君心香我未識君來銘君墓咫尺金閭

空嗟來暮棲君體魄鄧尉之隅何以娛君梅花萬株

泰和蕭君墓誌銘

君諱紹典字芳林一字楷堂姓蕭氏江西泰和千秋鄉人曾祖秀妣氏彭祖美聖妣氏劉父炳南妣氏彭俱以兄紹芬官三品銜刑部郎中

晉贈一品君昆弟四人行第居次十歲隨父客於蜀與兄同學當時有二陸之譽咸豐丙辰年十八應寄籍宜賓縣試鄭學使瓊詔得卷歎賞拔冠軍文童譚然學使傳示面試限晷刻納卷而君文較正場尤勝學使張文於壁譚者帖服後由蜀歸里復補泰和縣學諸生未幾祖母歿母又下世父客於外君經紀喪葬盡哀盡禮遠近咸感慕焉光緒丁丑受知吳

學使仁傑兩置首選食餼已卯擬選優以次場未入場失之
旋中副車座主爲汪侍郎鳴鑾吳侍郎樹梅揭曉後謁兩師
具言闈中擬中七十一名因三藝均過八百字恐千磨勘抑
正就副歎惜之並勉勵之壬午堂備仍不售乃以副貢就教
職尋改試用道分發浙江丙戌父自蜀歸年近八旬念報
國日長報親日短遂留養未之官戊子大比父命赴試詎將
入闈一疾弗起於八月十一日捐館旅次年五十歲猶子敷
德侍營賻襁長子敷政奔喪至省扶櫬歸君篤於孝行動循
禮法父治家嚴肅終日侍側雖行年五十恂恂如孺子有命
盤辟踖踖不謂之坐不敢坐遇盛怒厲聲譴訶君貌愈恭色
愈愉甚或予杖跪而受觀者以爲有伯俞之風母歿時宅兆

未卜君通形家言奔走窮山不避險阻日行數十里兩足潰
腫未嘗言勞年餘始得吉壤自窆後家道日順焉君耽於學
手不釋卷嚴寒盛暑吟聲騰沸戶外一切星經地志醫學相
法之書廣搜博覽強記大略恆至鐘鳴漏盡而不知倦性好
議論遇忠孝節烈可驚可愕之事伸紙染翰累累數千百言
同輩先達無不頻首獨艱於一第俛得俛失屢挫其銳然學
成專家名重當世明之侯朝宗

國朝之胡天游決不以科名爲輕重也君狀貌豐腴事理通
達與朋友交坦白率真自奉儉樸不殊寒素而慷慨好義力
能爲所當爲在縣則修大成坊孝弟忠義祠節婦祠改葬瀕
河古冢以鉅款助寶興暨萃和書院膏火公請

旌獎在郡則修學宮之櫺星門鷺洲書院之前楹振邑中雲
停仙槎仁善三鄉費七千金人慶更生而尤於根本之地加
意培植總祠支祠祭典多缺則置田以籌備之譜牒焚毀則
發凡起例而增修之鰥寡孤獨則養之貧至不能嫁娶者則
周之子弟無力就學者則設義塾以訓迪之其待宗族子姓
言正而色和閨門食指逾百咸敬禮無惰容靈櫬至自南昌
皆迎哭失聲卽此可概見矣君行成於家學積於躬惠澤浹
於鄉黨而竟不克永年齋志以歿幾疑天道無知而君之子
早捷於鄉歿且二十餘年君所未竟之志悉舉而完之天之
報君將不於彼而於此耶元配石氏先君五年卒繼配王氏
側室王氏子四長敷政癸巳 恩科舉人花翎員外郎銜內

閣中書次敷教花翎湖南候補同知均石夫人出次敷烈五
品銜光祿寺署正次敷熏五品銜大理寺評事庶出女二長
適同邑歐陽輔次適同邑王之培孫七敏才敏標敏仁敷教
出敏佑敏偉敏敏佳敏侃敷烈出初葬某山某原光緒某年改
葬邑城北四十八都楓山之原敷政等遠寄行略介老友徐
積餘求銘謹擇其大者而銘之曰

通天巖畔園曰春浮地靈人傑迹往名留族裔明經志行卓
犖玉闕璫璣鋒韜干莫年不副德位不稱才天實爲之謂之
何哉周禮六行一曰任恤惠人和風積善長日君所勗始有
子終之君所樂成有子充之遺憾旣彌令名克振天道有知
徵君益信佳城鬱鬱荒草離離我銘有道庶無愧辭

安徽靈璧縣知縣楊君墓志銘

國朝碩德高門其子弟往往品行敦篤文采彪炳出而服官
應機酬變異乎俗吏所爲如常熟楊君者可以證言之不虛
矣君諱同福字思贊又號師載江蘇常熟人曾祖景仁嘉慶
戊午舉人刑部安徽司員外郎總辦秋審處祖希鉅國學生
父沂孫道光癸卯舉人安徽鳳陽府知府候選道篆隸行楷
各體皆擅長海內推爲鄧完白先生後一人君幼而岐嶷祖
訓甚嚴課經之暇旁及子史時以先儒正心修身之學爲訓
一言一動繩之不少貸年十三讀十三經畢爲文才氣縱橫
不爲繩墨所囿咸豐庚申補博士弟子員是秋邑淪於寇避
難崇川同治甲子順天鄉試挑送謄錄

國史館議敘鹽大使西捻張總愚竄直東畿輔戒嚴

朝廷命李文忠公爲

欽差大臣專辦剿匪事宜君謁李公於開州命入前敵吳武壯公長慶營時賊由樂陵南竄武壯委君分帶馬隊向臨邑一帶築土城以範賊賊窘迫乘夜回竄勢甚慄悍兵單弱咸失色君曰賊已敗竄雖多奚懼乘天未明彼不知我虛實速迎剿之乃出隊援兵適至併力夾擊賊狂奔我軍奮勇追殺立殲悍酋張宗先一股未幾總愚走死西捻蕩平英果敏公翰開府院中邀君入幕以直東肅清案內保奏奉旨以知縣分省補用加同知銜四月引

見指省安徽因挈眷赴皖委幫辦阜陽縣事阜邑民風強悍

命盜案日數起君與正在彭君和衷其理年餘盜風漸息旋補貴池邑濱江散勇出沒無常君下車伊始手訂保甲章程規畫盡善雪夜往捕會匪獲十餘人分別首從按律懲辦又縣重賞緝巨魁得名冊於溽暑中悉心研鞫設廳於堂下令繳旗布一日而滿閭閻得以安堵降將李世忠參革後驕悍猶昔潛至池邑屬境聚賭匪類叢集勢將滋事君親往禽之佯爲不知誰何者將加嚴責李乃自陳則隆以禮貌而莊語規勸之李悔愧引過時居民震其凶餒謠言四起事聞省中有夜半入告中丞者張大其詞遂委張軍門來池詰問而君措置安洽行將解省矣上游壯其膽識益加契重在任六年獄訟日簡聲望日起調補靈璧未及赴任丁父憂星奔旋里

經營喪葬服闋遂不復出生平酷好金石文字搜羅搨本不下千餘通觀覽臨摹寒暑不輟原本家學加之功力吳憲齋中丞以篆法名於時亦相推服里居十八年優游樂道不與外事而於邑中善舉則精心擘畫不辭勞瘁光緒二十五年五月得疾六月二十三日卒年五十有八元配丁淑人未久卽沒繼配趙淑人亦陽湖世家也在家事父母以孝聞出閤事重闈以賢聞佐治以勤敏聞教予以整肅聞至友女嫁於名門女僕痛於身後在淑人猶常事也後君七年卒今與君柩合葬於本邑某鄉之原子覲堯附貢生 會典館膳錄議敘通判女三長適陽湖舉人汪道怡次未字卒次適同里趙士策孫男四定輔兩江師範學堂畢業生定瀛定墉定鉉俱

幼覲堯持狀乞銘荃孫不敢辭因作銘曰

虞山截業尙湖汪洋山川靈秀鍾毓於楊少事祖庭洽聞殫
見淬鋒十年鬱爲宵練出贅天水玉潤冰清名師益友吟社
飛聲戎馬西來憑陵畿甸君時治軍沈機決戰殫冠篋仕涖
駕江皋君時治事意氣彌高鳴琴容與古縣秋浦除暴安良
四民得所君去十年民猶憶之法所不及天亦殛之息我江
壩劬書好古福我里氓護持善舉宛宛同穴鬱鬱佳城卜後
嗣之克昌驗貽謀之永亨

俞太夫人墓志銘

太夫人姓俞氏世爲婺源人祖從榮占籍江甯父煊早卒母
管

旌表節孝太夫人幼嫻姆教婉婉淑慎授讀經史貫通大義
年二十三歸無錫林介眉大令林亦由婺源遷無錫鄉情世
好遂締姻焉大令服官江右署吉水樂安縣事旋補宜春時
粵寇縱橫省無完邑大令調信豐城守太夫人寄吉郡避寇
鄉閒鄉人以匪仇官累及太夫人指潭水矢之曰吾家數
十口流離至此脫不幸有如此水不累爾曹也鄉人感動遂
留居及郡城陷謀他徙鄉人從之越境者均免難信義所孚
神明奉之矣大令到宜春任晉省猝歿太夫人絕而甦者再
以死者未殯葬生者缺衣食銜悲茹痛勉力支持大吏閱其
貧賻以巨款太夫人謝曰吾夫子一生取與不苟敢以貧而
傷其廉乎力卻不受三子志仁志道志禮均有治行負能名

人咸頌賢母之教也迨志道入江督幕迎養至江甯甯居近母家姻婭重聚太夫人願而樂之未幾志禮先歿志仁繼之耄齒傷心病由此起遂以甲辰八月二十三日卒於江甯甯寓所年八十有一

誥封宜人

晉封夫人某月某日葬於江西新建縣桃花鄉荃孫貫同郡同寓江甯甯志道以狀求文爰爲之銘曰

事父母止於孝相夫子綜其要貽子孫施以教傳懿訓兮享高年松柏丸丸兮歸新阡永貽後嗣兮福澤縣

柳母鮑孺人志銘

宣統庚戌門人柳貽徵居母喪自丹徒貽書曰我父之歿也

幼嘉言懿行無所聞今母又歿而貽徵年三十有二矣謹具
事略爲志前徽謹按略孺人姓鮑氏丹徒人乾隆中舉鴻博
世稱海門先生孺人之高祖也幼讀四子書強記異常童閒
製小詩不出海門先生家法家本素封經寇中落孺人以女
紅佐饔飧無驕貴習年二十九歸同邑柳君泉泉字逢原邑
諸生柳氏世以經術名春林先生尤精濂洛之學泉之曾祖
也家赤貧無立錫地以教授餬口孺人椎布操作有梁孟風
逾年生一女逾七年生一子卽貽徵也貽徵生七歲而孤遺
命貽徵必讀書依外氏以居孺人流涕受命葬畢常住外家
孺人自課之進則色喜荒則色憂有以學賈勸輒流涕以遺
言卻之逮貽徵補弟子員充（補）垣學堂教習授室移居處境

稍裕而孺人漸多病近年喪婿喪兄心緒日棘疾益不可爲遂歿于宣統二年正月十四日年六十有六四月祔葬于丹徒城南朱家岡夫塋禮也柳鮑清門世族著聲京口才質德行皆有儀法孺人暮年病軀親友勸入劇場以散鬱斷斷以爲不可並著爲家誠此其閭德有過人者宜貽徵篤志向學讀書能自立也爰作銘曰

昔賢汪氏爲慈母言暑溼寒餓煦育後昆後昆繼起焜耀里門母也力竭奄忽九原枝葉日茂難培本根我聞此言涕淚潺湲柳母亦然夫復奚論縣縣荒郊松檟永存孺人之德施于子孫

藝風堂文續集卷一